

Cjâr preToni,

a rivuart dal to scrit a p. 11 dal ultin numar de "Patrie": parcè tant velen cuintri chest Pape? Parcè ripeti in chest moment dute le vecje naine antipapâl, antiromane, antistituzionâl, antigjerarchiche, antiautoritarie, che e cor jù par dute la storie dal cristianisim di chest mileni, e e à animât dutis lis eresii, di Joachim di Fiore a Lutero, al modernisim, ai predis operaris dai agns sessante? Cualis sono lis convinziions e devoziions personâls di Zuan Pauli II, che lui al impon al mont intîr? Forsit il so amôr pe Madone, che secont me al è une des robis umanementri plui bielîs dal catolicisim, e un dai motîfs plui fonts de sô superioritât su chês altris confessions cristianis? Su cualis robis che no son di sô competence isal intervignût, te (evidentementri abusive) convinzion di jessi l'unic rapresentant di Crist, e te (evidentementri ilusorie) convinzion di jessi un leader mondial? Cui sono chei che á fasin de sô persone un cult? Cuai sono i moviments che i batin lis mans par puartâ indenant i lôr progjets no ducj spirituâi? Mi plasarès che tu vessis il coraç di fevelâ plui clâr, e no dome par alusions gjenerichis.

Personalmentri jo o crodi che se i apuestui si fossin dome disfats jenfri la int tant che il sâl, il messaç di Crist nol sarès durât fin a noaltris. Jo o stoi salt su chel che mi àn insegnât a dutrine, tant timp fa, che il Pape di Rome al è il sucessôr di Pieri, il cjâf de glesie e il vicjari di Crist in tiere; e che cuant che al fevele de catedre, nol po falâ. Mi pâre che se un nol crôt a chestis robis, al è fûr de Glesie catoliche. Jo o soi une vore content che la mê religjion e vedi un aparât istituzionâl, une organizazion, une gjerarchie e un cjâf; un pari che o podin crodi in lui, scoltâlu, ubidîlu e amâlu.

Se il primat dal nestri Pape al è un ostacul ale union ecumeniche di ducj i cristians, pazienze. Intant, no crodi che sedi il sôl e nancje il plui grant. E po, viodarin dal al di là cui c'al veve reson.

Par chest Pape in particulâr po, jo o ai ancje la plui grande amirazion, par tancj motîfs. Un al è il so contribût dal dut centrâl, decisîf, di impuartance storiche, a la liberazion dal Est european e dal mont dal comunisim. Forsit no si visais, voaltris predis di çampe, che il comunisim nol è stat dome une ditature sanguinarie, cun desenis di millions di muarts su la cussience, ma ancje ateist, opressôr e persecutôr di ogni religjon. O ai tant l'impression che la nimistât de çampe cuintri chest pape e ven propit dal so trionf cuintri il comunisim.

Dut câs, no sta vê fastilis, pre Toni. Mi pâr che in curt voaltris nemîs di Pape Zuan Pauli o sarês diliberâts de sô presince su cheste tiere, e ancje lui al sarà diliberât des sôs faturis.

Raimont di Strassolt

(~~ex~~ S.D.; circa 2004
NON CONSTA LA PUBBLICAZIONE